

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst (“Službene novine Zeničko-dobojskog kantona”, broj: 7/10 i 3/23), te Strategije razvoja Zeničko-dobojskog kantona za period 2021.-2027. godina („Službene novine Zeničko-dobojskog kantona“ broj: 3/21), Akcionog plana za implementaciju Strategije razvoja Zeničko-dobojskog kantona za period 2025.-2027. godina i Godišnjeg plana rada Ministarstva za rad, socijalnu politiku i izbjeglice Zeničko-dobojskog kantona za 2025. godinu, na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 85. sjednici, održanoj dana 13.06.2025. godine,
d o n o s i

ZAKLJUČAK

I.

Daje se saglasnost na prijedlog „Programa sufinansiranja zapošljavanja Posao za sve 2025./2026.“, Ministarstva za rad, socijalnu politiku i izbjeglice Zeničko-dobojskog kantona i JU Službe za zapošljavanje Zeničko-dobojskog kantona.

II.

Ovlašćuje se Ministarstvo za rad, socijalnu politiku i izbjeglice da u ime Vlade Zeničko-dobojskog kantona potpiše Program iz tačke I. ovog zaključka.

III.

Međusobna prava i obaveze strana potpisnica Programa i poslodavaca-korisnika Programa, detaljno će biti uređena Ugovorom o sufinansiranju, koji će potpisati ministar za rad, socijalnu politiku i izbjeglice, direktor JU Služba za zapošljavanje kao implementator Programa i poslodavci kao korisnici Programa.

IV.

Vlada Zeničko-dobojskog kantona će po davanju saglasnosti na Program, donijeti posebnu odluku o odobravanju sredstava za sufinansiranje istog, nakon čega će sredstva biti doznačena JU Služba za zapošljavanje Zeničko-dobojskog kantona za realizaciju Programa.

V.

Za realizaciju Programa zadužuju se Ministarstvo za rad, socijalnu politiku i izbjeglice i JU Služba za zapošljavanje Zeničko-dobojskog kantona, svako u okviru svoje nadležnosti.

VI.

Zaključak stupa na snagu danom donošenja.

Broj: 02-_____/25
Datum, 13.06.2025. godine
Zenica

PREMIJER

Nezir Pivić

DOSTAVLJENO:

1x Ministarstvo za rad, socijalnu politiku i izbjeglice,
1x JU Služba za zapošljavanje Zeničko-dobojskog kantona,
putem Ministarstva,
1x a/a.

PROGRAM SUFINANSIRANJA ZAPOŠLJAVANJA
POSLO ZA SVE 2025./2026.

1. Osnov za donošenje, izvor finansiranja i nosioci realizacije Programa

U skladu sa Zakonom o posredovanju u zapošljavanju i socijalnoj sigurnosti nezaposlenih osoba (Službene novine Federacije BiH, broj: 55/00, 41/01, 22/05 i 9/08), Ministarstvo za rad, socijalnu politiku i izbjeglice (u daljem tekstu: Ministarstvo) i JU Služba za zapošljavanje Zeničko-dobojskog kantona (u daljem tekstu: Služba) sačinili su „Program sufinansiranja zapošljavanja Posao za sve 2025./2026.“ (u daljem tekstu: Program).

Finansijska sredstva koja su potrebna za realizaciju Programa planirana su u iznosu od 600.000,00 KM, a koja će biti obezbijedena od strane Vlade Zeničko-dobojskog kantona putem Ministarstva za rad, socijalnu politiku i izbjeglice Zeničko-dobojskog kantona. Nositelj realizacije ovog Programa je JU Služba za zapošljavanje Zeničko-dobojskog kantona.

2. Cilj Programa

Program se realizuje s ciljem zapošljavanja najmanje 50 osoba sa evidencije nezaposlenih u Zeničko-dobojskom kantonu. Prednost u zapošljavanju će se dati posebnim grupama osoba iz socijalno i rodno osjetljivih kategorija, radi njihovog zapošljavanja, sprečavanja dugotrajne nezaposlenosti, očuvanja i unapređenja radnih sposobnosti, te stvaranja uslova za jačanje konkurentnosti mladih osoba.

3. Ciljna grupa

Ciljna grupa su osobe prijavljene na evidenciju nezaposlenih na području Zeničko-dobojskog kantona najmanje dan prije objave Javnog poziva, bez obzira na radno iskustvo, spol, dob i stepen obrazovanja, a posebno:

- osobe evidentirane kod Službe za zapošljavanje duže od godinu dana;
- žene;
- osobe bez radnog iskustva;
- raseljena lica i povratnici u ZDK (dokaz: rješenje o priznatom statusu raseljenog lica/uvjerenje o statusu povratnika);
- radno sposobne osobe sa invaliditetom (dokaz-uvjerenje sa Instituta za medicinsko vještačenje);
- djeca i supružnici osoba s invaliditetom od 60% i više (dokaz - uvjerenje općine)
- samohrani roditelji, staratelji i hranitelji i njihova djeca (dokaz - uvjerenje centra za socijalni rad);
- roditelji djeteta sa posebnim potrebama i roditelji teško bolesne djece (dokaz - uvjerenje centra za socijalni rad, druga relevantna dokumentacija);
- žrtve nasilja, žrtve nasilja u porodici i djeca žrtava nasilja, civilne žrtve rata (dokaz - uvjerenje centra za socijalni rad, MUP-a, suda, te sigurne kuće);
- liječeni ovisnici (dokaz - uvjerenje specijalizirane medicinske ustanove, uvjerenje komune);
- bivši štíćenici doma za nezbrinutu djecu (dokaz - uvjerenje doma za nezbrinutu djecu, uvjerenje centra za socijalni rad);
- članovi domaćinstva u kojem nijedan član nije zaposlen (dokaz – kućna lista i uvjerenje biroa rada).

Poslodavacu se neće sufinansirati zapošljavanje osobe koju je otpustio u proteklih dvanaest mjeseci prije objave Javnog poziva.

4. Korisnici Programa

Korisnici Programa su poslodavci registrovani u Zeničko-dobojskom kantonu koji redovno izmiruju obaveze po osnovu poreza i doprinosa, te oni koji imaju potpisan sporazum sa Poreznom upravom Federacije BiH o izmirenju duga po osnovu doprinosa, kao i oni na koje se odnosi Zakon o finansijskoj konsolidaciji.

U Programu ne mogu učestvovati:

- poslodavci koji su koristili kreditna sredstva iz poticajnih mjera Federalnog zavoda za zapošljavanje i JU Službe za zapošljavanje ZDK, a nisu ispoštovali obaveze u skladu sa zaključenim ugovorima i ne pravdaju redovno ugovorena sredstva,
- poslodavci koji ne izmiruju redovno obaveze po osnovu poreza i doprinosa ili koji nemaju potpisan sporazum sa Poreznom upravom FBiH o izmirenju duga po osnovu poreza i doprinosa.

Maksimalan broj osoba za koje jedan poslodavac može aplicirati je tri (3).

5. Način i iznos sufinansiranja

Ministarstvo će pripremiti prijedlog odluke o odobravanju sredstava za sufinansiranje Programa, koja će po donošenju predmetne odluke Vlade Zeničko-dobojskog kantona biti transferisana u punom iznosu na račun JU Službe za zapošljavanje Zeničko-dobojskog kantona, kao namjenska sredstva za realizaciju Programa u 2025. i 2026. godini.

Programom je predviđeno sufinansiranje troškova doprinosa, a u slučaju da je iznos sufinansiranja veći od troškova doprinosa, ostatak iznosa sufinansiranja se koristi za isplatu dijela neto plate. Služba korisniku, po dostavljenom pravdanju, refundira sredstva.

Služba će korisnicima sredstava, sa kojima se zaključi ugovor o sufinansiranju zapošljavanja, u narednih 12 mjeseci isplaćivati poticajna sredstva u iznosu od po 1.000,00 KM mjesečno po zaposlenoj osobi.

6. Priprema za realizaciju Programa

U okviru pripremne faze Programa, Služba:

- sa Ministarstvom potpisuje Program Posao za sve 2025/2026, nakon što Vlada Zeničko-dobojskog kantona da saglasnost na isti,
- informiše javnost o Programu najkasnije osam (8) dana prije objave Javnog poziva putem web portala Službe, te putem web portala Vlade ZDK;
- izrađuje obrasce potrebne za realizaciju Programa.

7. Prijava na Program

Prijave za učešće na navedeni Program vrše se dostavljanjem dokumentacije na protokole biroa rada prema sjedištu djelatnosti poslodavaca. Poslodavci su u obavezi dostaviti sljedeću dokumentaciju:

- Obrazac prijave

- Uvjerenje Porezne uprave Federacije BiH o izmirenim porezima i doprinosima ne starije od mjesec dana od dana podnošenje prijave za sufinansiranje/Obrazac prijave Program sufinansiranja zapošljavanja Posao za sve 2025/2026 ili Sporazum s Poreznom upravom Federacije BiH o izmirenju duga po osnovu poreza i doprinosa
- Dokaz o glavnom računu (karton deponovanih potpisa, ugovor o tekućem računu sa bankom, ili potvrda o računu)

Prijave na mjeru se evidentiraju u realnom vremenu, po datumu i vremenu zaprimanja. Sve prijave će, u skladu sa pravilima Programa, biti provjerene. Specifične kriterije Programa utvrđuje Služba.

Služba će na svojoj web stranici postaviti informaciju o prispjelim prijavama poslodavaca sa statusom „odobrene“ i „na čekanju“. Poslodavac može, na vlastitu odgovornost, zaposliti osobu iz ciljne grupe odmah nakon prijave na Javni poziv s tim što će se ugovor o sufinansiranju zapošljavanja zaključiti samo sa poslodavcima koji ispunjavaju uslove Programa, u okviru raspoloživih sredstava ili nakon što ga Služba obavijesti da mu je poticaj odobren, a najkasnije u roku od 15 dana od dana odobravanja poticaja.

8. Zaključivanje ugovora o sufinansiranju

Poslodavac kojem se poticaj odobri, sa ciljem zaključivanja ugovora, dužan je Službi dostaviti sljedeću dokumentaciju najkasnije u roku od 15 dana od dana kada ga Služba obavijesti da mu je poticaj odobren:

- Kopiju obrasca prijave na Javni poziv
- ugovore o radu sa nezaposlenim osobama čije se zapošljavanje sufinansira

Ukoliko je dokumentacija potpuna i validna, zadovoljavajuća/odgovarajuća, Služba priprema tri (3) primjerka ugovora o sufinansiranju zapošljavanja i poziva poslodavca da iste potpiše. Nakon što poslodavac potpiše i ovjeri sve primjerke ugovora, Služba potpisuje i ovjerava iste, te ih dostavlja Ministarstvu. Ukoliko su svi uslovi ispunjeni, Ministarstvo potpisuje i ovjerava sve primjerke ugovora, te zadržava jedan (1) primjerak, a ostale vraća Službi. Služba zadržava jedan (1) primjerak ugovora, a jedan (1) prosljeđuje poslodavcu.

9. Pravljenje i isplata ugovorenih sredstava

Po potpisivanju Ugovora, Služba mjesečno isplaćuje/refundira na račun poslodavca, sredstva za prethodni mjesec, a po izvršenim provjerama u bazi Porezne uprave.

Poslodavac se obavezuje da će, sve do isteka ugovornog odnosa, mjesečno, u pravilu do kraja mjeseca za prethodni mjesec, putem e-maila obavještavati Službu o uplaćenim doprinosima za zaposlenike.

Obavijest mora sadržavati sljedeće podatke: naziv poslodavca, JIB poslodavca, te naziv programa po kojem je zaključen ugovor o sufinansiranju zapošljavanja, kao i ime i prezime i JMBG sufinansirane osobe. Poslodavac se obavezuje da će, u slučaju potrebe, a po zahtjevu Službe, dostaviti Službi specifikacije, platne liste i dokaze o uplati plate i doprinosa.

10. Opće odredbe

U pogledu zaključivanja, trajanja i raskida ugovora o radu i drugih situacija analogno se primjenjuju sljedeća pravila:

- poslodavac može zaključiti ugovor o radu i izvršiti prijavu osobe na obavezna osiguranja (obrazac JS 3100) na dan apliciranja na Javni poziv, s tim što će se ugovor o sufinansiranju zapošljavanja zaključiti samo sa poslodavcima koji ispunjavaju uslove Programa, u okviru raspoloživih sredstava.
- u slučaju raskida ugovora o radu sa sufinansiranom osobom, poslodavac ima pravo na 1 zamjensku osobu, sa kojom zaključuje ugovor o radu u roku od 10 dana od dana raskida ugovora sa prvozaposenom osobom. Trajanje sufinansiranja zamjenske osobe će se realizovati na preostali period trajanja ugovora prvozaposlene osobe.
- u slučaju nastupanja okolnosti da je osoba čije se zapošljavanje sufinansira, privremeno spriječena za rad duže od 42 dana ili koristi porodiljsko odsustvo, o čemu Služba informiše Ministarstvo, sufinansiranje zapošljavanja se obustavlja za taj period. U slučaju povratka na rad osobe po prestanku predmetnih okolnosti, poslodavca za preostali period ima pravo nastaviti koristiti prava određena Programom i ugovorom o sufinansiranju zapošljavanja. Služba je u obavezi evidentirati navedene slučajeve te o istom blagovremeno obavijestiti Ministarstvo
- u slučaju umanjenja finansijske vrijednosti ugovora, radi efikasnosti i ekonomičnosti realizacije Programa, poslodavac je obavezan e-mailom obavijestiti Službu o nastalim promjenama što ugovorne strane prihvataju bez posebnih aneksa ugovoru.
- statusne promjene poslodavca tokom realizacije ugovora o sufinansiranju zapošljavanja (djelatnost, JIB, organizacijski oblik) nisu dozvoljene, te u slučaju istih Služba raskida ugovor o sufinansiranju zapošljavanja.
- svi korisnici Programa pristaju da Služba obrađuje njihove lične podatke u svrhu provođenja Programa, te da se njihovi podaci mogu objaviti na web stranici Službe, u svrhu informisanja javnosti o prijavama na javni poziv, te radi transparentnosti provođenja Programa.

11. Kontrola i praćenje izvršenja ugovorenih obaveza

Služba će kontinuirano pratiti realizaciju Ugovora, i to:

- provjerom dokumentacije/obavijesti koju poslodavac dostavlja, radi pravdanja odobrenih sredstava
- provjerom podataka na portalu Porezne uprave FBiH
- prema potrebi i kontrolom provođenja ugovorenih obaveza neposredno kod poslodavca.

Ukoliko se praćenjem realizacije ugovorenih obaveza utvrdi da ih poslodavac ne ispunjava, Služba će pokrenuti postupak raskidanja ugovora.

12. Izvještavanje Ministarstva o provedbi Programa

Služba je obavezna Ministarstvu polugodišnje dostavljati izvještaj o utrošku sredstava, a radi praćenja realizacije Programa. Po okončanju Programa, Služba će Ministarstvu dostaviti konačni izvještaj o realizaciji Programa sa efektima istog uz dokaze o isplati sredstava poslodavcima.

Ministarstvo za rad, socijalnu
politiku i izbjeglice Zeničko-dobojskog kantona

MINISTAR
Antonio Šimunović

JU Služba za zapošljavanje
Zeničko-dobojskog kantona

DIREKTOR
Josip Lovrić

Broj:
Datum:

Broj:
Datum: